

影刊宋金元明本詞

第二册

蘇平知學

PDG

竹山先生出義興鉅族宋南渡後有名璪字宣卿者  
善書仕亦通顯子孫俊秀所居擅溪山之勝故先生  
貌不揚長於樂府此藁得之於唐士牧家藏本  
至正乙巳秋七月錄

竹山詞目

賀新郎 五

沁園春 二

女冠子 二

大聖樂 一

解連環 一

永遇樂 一

花心動 一

金盞子 一

喜遷鶯 一

晝錦堂 一

水龍吟 一

瑞鶴仙 四

木蘭花慢 二

玊珠簾 一

高陽臺 三

春夏兩相期 一

念奴嬌 一

絳都春 一

聲聲慢 一

尾犯 一

滿江紅 二

探芳信 一

梅花引 一

洞仙歌 二

寂高樓 一

祝英臺 一

風入松 一

解佩令 一

一剪梅 二

糖多令 一

柳梢青 一

阮郎歸 一

金蕉葉 一

憶秦娥 一

謁金門 三

菩薩蠻 二

卜筭子 二

霜天曉角 五

點絳脣 二

昭君怨 一

如夢令 一

小重山 二

白苧 一

蝶戀花 一

虞美人 二

南鄉子 二

步蟾宮 二

玉樓春 一

戀繡衾 一

浪淘沙 二

燕歸梁 一

步蟾宮 一

南鄉子 一

行香子 一

粉蝶兒 一

翠羽吟 一

賀新郎 三

摸魚子 一

沁園春 一

喜遷鶯 二

齊天樂 一

念奴嬌 一

應天長 一

賀新郎 一

玉漏遲 二

高陽臺 一

探春令 一

秋夜雨 四

少年遊 二

柳梢青 一

霜天曉角 一



竹山詞

竹山蔣捷勝欲撰

賀新郎

秋曉

渺渺啼鴉了。巨魚天寒生峭嶼。五湖秋曉。竹几一鐙  
人。做夢嘶馬。誰行古道。起搔首。窺星多少。月有微  
黃籬。無影挂牽牛數朶。青花小秋。太淡添紅棗。

愁痕倚賴。西風掃被。西風翻催鬢。鬢與秋俱老。舊  
院隔霜簾。不捲金粉屏邊。醉倒計無此。中年懷抱。  
萬里江南。吹簫恨恨。參差白鴈橫天。杪煙未斂。楚  
山杳。

又約友三月旦飲

鴈嶼晴嵐薄倚層屏千樹高低粉纖紅弱雲隘東風  
藏不盡吹艷生香萬壑又散入汀蘅洲葯擾擾勿  
勿塵土面看歌鶯舞燕逢春樂人共物知誰錯

寶釵樓上圍簾幙小嬋娟雙調彈箏半霄鸞鶴我  
輩中人無此分琴思詩情當却也勝似愁橫眉角  
芳景三分才過二便綠陰門巷楊花落沽斗酒且  
同酌

又吳江

浪湧孤亭起是當年蓬萊頂上海風飄墜帝遣江神



長守護八柱蛟龍纏尾闕吐出寒烟寒雨昨夜鯨  
翻坤軸動卷雕翬擲向虛空裏但留得絳虹住  
五湖有客扁舟艤怕群仙重遊到此翠旌難駐手  
拍欄杆呼白鷺為我慇懃寄語柰鷺也驚飛沙渚  
星月一天雲萬壑覽茫茫宇宙知何處鼓雙楫浩  
歌去

又懷舊

夢冷黃金屋嘆秦箏斜鴻陣裏素絃塵撲化作嬌鶯  
飛歸去猶認紗窓舊綠正過雨荆桃如苺此恨難  
平君知否似瓊臺湧起彈棋局消瘦影嫌明燭

鶯樓碎瀉東西玉問芳悰何時再展翠釵難卜待  
把宮眉橫雲樣描上生綃畫輻怕不是新來粧束  
綵扇紅牙今都在恨無人解聽開元曲空掩袖倚  
寒竹

又 兵後寓吳

深閣簾垂綉記家人軟語燈邊咲渦紅透萬疊城頭  
哀怨角吹落霜花滿袖影廝伴東奔西走望斷鄉  
關知何處羨寒鴉到著黃昏後一點點歸楊柳  
相看只有山如舊嘆浮雲本自無心也成蒼狗明  
日枯荷包冷飯又過前頭小阜趁未發且嘗村酒

醉探枵囊毛錐在問鄰翁要寫牛經否翁不應但  
搗手

沁園春 為老人書南堂壁

老子平生辛勤幾年始有此廬也學那陶潛籬栽些  
菊依他杜甫園種些蔬除了雕梁肯容紫燕誰管  
門前長者車恠近日把一庭風月却借伊渠 鬢  
邊白髮紛如又何苦招賓約客歟但夏榻宵眠面  
風敲枕冬簷晝短背日觀書若有人尋只教僮道  
這屋主人今自居休羨彼有搗金寶纒織翠華裾

又 次強雲卿韻

結筭平生風流債負請一筆勾蓋攻性之兵花園錦  
陣毒身之鳩笑齒歌喉豈識吾儒道中樂地絕勝  
珠簾十里樓迷底嘆晴乾不去待雨淋頭 休休  
著甚來由硬鉄漢從來氣食牛但只有千篇好詩  
好曲都無半點閑悶閑愁自古嬌波溺人多矣試  
問還能溺我否高擡眼看牽絲傀儡誰弄誰收

女冠子

元夕

蕙花香也雪晴池館如畫春風飛到寶釵樓上一片  
笙簫琉璃光射而今燈謾挂不是暗塵明月那時  
元夜况年來心懶意怯羞與蛾兒爭耍 江城人

悄初更打問繁花誰解再向天工借剔殘紅炮但  
夢裏隱隱鈿車羅帕吳牋銀粉研待把舊家風景  
寫成閑話笑綠鬢鄰女倚窓猶唱夕陽西下

又 競渡

電旂飛舞雙龍還又爭渡湘灘雲外獨醒何在翠葯  
紅蘅芳霏如故深衷全未悟不似素車白馬卷潮  
起怒但悄然千載舊跡時有閑人吊古 生平慣  
笑枿蘭苦甚魄沉寒浪更被饒蛟妬結瓊紉璐料  
貝闕隱隱騎鯨煙霧楚妃花倚暮玉瓊簫吹了泝  
陂同步待月明洲渚小留旌節朗吟騷賦

大聖樂 陶成之生日

笙月涼邊翠翹雙舞壽仙曲破更聽得艷拍流星慢  
唱壽詞初了群唱蓮歌主翁樓上披鶴氅展一笑  
微微紅透渦襟懷好縱炎官駐繖長是春和 千  
年鼻祖事業記曾赴雷聲飛快梭但也曾三徑撫  
松採菊隨分吟哦富貴浮雲榮華風過淡處還他  
滋味多休辭飲有碧荷貯酒深似金荷

解連環 岳園牡丹

妬花風惡吹青陰漲却亂紅池閣駐媚景別有仙葩  
遍瓊甃小臺翠油踈箔舊日天香記曾遶玉奴絃

索自長安路遠膩紫肥黃但譜東洛 天津霽虹  
似昨聽鶯聲度月春又寂寞散艷魄飛入江南轉  
湖渺山茫夢境難托萬疊花愁正困倚鈎闌斜角  
待携樽醉歌醉舞勸花自樂

永遇樂

綠陰

清逼池亭潤侵山閣雲氣凝聚未有蟬前已無蝶后  
花事隨逝水西園支徑今朝重到半碍醉筇吟袂  
除非是鶯身瘦小暗中引雛穿去 梅簷溜滴風  
來吹斷放得斜照一縷玉子敲枰香綃落剪聲度  
深幾許層層離恨淒迷如此點破謾煩輕絮應難

認爭春舊館倚紅杏處

花心動

南塘元夕

春入南塘粉梅花盈盈倚風微笑虹暈貫簾星毳攢  
巷徧地寶光交照湧金門外樓臺影參差浸西湖  
波渺暮天遠芙蓉萬朶是誰移到鬢鬢雙仙未  
老陪玳席嘉賓暖香雲繞翠篴叩冰銀管噓霜瑞  
露滿鍾頻酌醉歸深院重歌舞瑯盤轉玊珠紅小  
鳳洲柳絲絲淡煙弄曉

金盞子

秋思

練月縈窓夢乍醒黃花翠竹庭館心字夜香消人孤



另雙鷓被他羞看擬待告訴天公減秋聲一半無  
情鴈正用恁時飛來叫雲尋伴 猶記杏籠煖銀  
燭下纖影卸佩鸞春渦暈紅豆小鶯衣嫩珠痕澹  
印芳汗自從信誤青驪想籠鶯停喚風刀快剪盡  
畫簷梧桐怎剪愁斷

喜遷鶯

莫春

游絲纖弱謾着意絆春春難憑托水煖成紋雲晴生  
影芳草漸侵裙幄露添牡丹新艷風擺秋千閑索  
對此景動高歌一曲何妨行樂 行樂君聽取鶯  
轉綠窓也似來相約粉壁題詩香街走馬爭柰鬢

絲翰却夢回晝長無事聊倚闌干斜角翠深處看  
悠悠幾點楊花飛落

游絲纖弱謾着意絆春春難憑托水煖成紋雲晴生  
影雙燕又窺簾幙露添牡丹新艷風擺秋千閑索  
對此景動高歌一曲何妨行樂 行樂春正好無  
柰綠窓孤角敲寒約錦幄調笙銀瓶索酒爭也曾  
迷着自從髮凋心倦長倚鈎欄斜角翠深處看悠  
悠幾點楊花飛落

右改前詞

畫錦堂

荷花

染柳煙消敲菰雨斷歷歷猶寄斜陽掩冉玉妃芳袂

擁出鬪場倩他鴛鴦來寄語駐君舴艋亦何妨漁  
榔靜獨奏權歌邀妃試酌清觴湖上雲漸暝秋  
浩蕩鮮風支盡蟬糧贈我非環非珮萬斛生香半  
蝸茅屋歸吹影數螺苔石壓波光鴛鴦笑何似且  
留雙槳翠隱紅藏

水龍吟

餽稼軒休招落梅之魂

醉兮瓊溼浮觴些招兮遣巫陽些君毋去此颶風將  
起天微黃些野馬塵埃汚君楚楚白霓裳些駕空  
兮雲浪茫洋東下流君往他方些月滿兮西廂  
些叫雲兮笛淒涼些歸來兮爲我重倚蛟背寒鱗

些些俯視春紅浩然一笑吐出香些翠禽兮弄曉  
招君未至我心傷些

瑞鶴仙

紅葉

縞霜霏霽雪漸翠設涼痕猩浮寒血山窓夢淒切短  
吟筇猶倚鶯邊新樾花魂未歇似追惜芳消艷滅  
挽西風再入柔柯誤染紺雲成纈休說深題錦  
翰淺泛瓊漪暗春曾泄情條萬結依然是未愁絕  
最怜它南苑空堦堆遍人隔仙蓬怨別鎖芙蓉小  
殿秋深碎蛩訴月

瑞鶴仙

鄉城見月

紺煙迷鴈迹，漸斷鼓零鍾。街喧初息，風檠背寒，壁放  
冰蟾飛到。絲絲簾隙，瓊魂暗泣，念鄉關、霜蕪似織。  
謾將身化鶴歸來，忘却舊游端的。懽極蓬壺，渠  
浸花院梨溶，醉連春夕。柯雲罷奕，櫻桃在夢，難覓  
勸清光，乍可幽窓相伴，休照紅樓夜笛。怕人間換  
譜，伊涼素娥未識。

又壽東軒立冬前一日

玉霜生穗也。渺洲雲翠，痕鴈繩低也。層簾四垂也。錦  
堂寒早，近開爐時也。香風遞也。是東籬花深處也。  
料此花伴我仙翁，未肯放秋歸也。嬉也。繒波穩

舫鏡月危樓醜瓊醜也籠鶯睡也紅催旋舞衣也  
待紗燈客散紗窓日上便是嚴凝序也換青氈小  
帳圍春又還醉也

又友人買妾名雪香

素肌元是雪向雪裏帶香更添奇絕梅花太孤潔問  
梨花何似風標難說長洲樣楫料鴛邊嬌蓉乍折  
對珠櫳自剪涼衣愛把淡羅輕疊清徹螺心翠  
壓龍吻瓊涎總成虛設微微醉纈窓燈暈弄明滅  
筭銀臺高處芳菲仙珮步遍纖雲萬葉覺來時人  
在紅幃半廊界月

木蘭花慢

冰

傍池闌倚遍問山影是誰偷但鷺斂瓊絲鴛藏綉羽  
礙浴妨浮寒流暗衝片響似犀推帶月靜敲秋因  
念涼荷院宇粉丸曾汎金甌粧樓曉澁翠罌油  
倦鬢理還休更有何意緒憐他半夜鉸破梅愁紅  
凋淚乾萬點待穿來寄與薄情收只恐東風未轉  
誤人日望歸舟

又

再賦

渺琉璃萬頃冷光射夕陽洲見敗柳漂枝殘蘆泛葉  
欲去仍留羅幃少年夢裏正窺簾月浸素肌柔誰

念衰翁自老斷髮凍得成虬 凝眸一望絕飛鷗  
宇宙正清幽謾細敲紫硯輕呵翠管吟思難抽颺  
颺晚風又起但時聽碎玉落簷頭多少梅花片腦  
醉來誤整香篝

珍珠簾

壽岳君選

書樓四面筠簾捲微薰起翠弄懸籤絲軟樓上讀書  
仙對寶笈霏轉繡館釵行雲度影艷壽觥盈盈爭  
勸爭勸奈芸邊事切花中情淺 金奏未響昏蜩  
早傳言放却舞衫歌扇柳雨一窩涼再展開湘卷  
萬顆蕖心瓊珠輞細滴與銀朱小硯深院待月滿



廊腰玉笙又遠

高陽臺 芙蓉

霞鑠簾珠雲蒸篆玉環樓婉婉飛鈴天壤王郎飈輪  
此地曾停秋香不斷臺隍遠溢萬鼓錦艷鮮明事  
成塵鸞鳳簫中空度歌聲 臞翁一點清寒髓慣  
食英菊興飲露蘭汀透屋高紅新營小樣花成霜  
濃月淡三更夢夢曼仙來倚吟屏共襟期不是瓊  
妃不是芳卿

又 送翠英

燕捲晴絲蜂黏落絮天教綰住閑愁閒裏清明匆匆

粉澁紅羞燈搖縹暈茸窓冷語未闌娥影分收好  
傷情春也難留人也難留 芳塵滿目總悠悠問  
縈雲佩響還繞誰樓別酒纔斟從前心事都休飛  
鶯縱有風吹轉奈舊家苑已成秋莫思量楊柳灣  
西且擢吟舟

又 閨元宵

橋尾星沉街心塵斂天公還把春饒桂月黃昏金絲  
柳換星搖相逢小曲方嫌冷便暖薰珠絡香飄却  
怜他隔歲芳期枉費囊綃 人情終似蛾兒舞到  
顰翻宿粉怎比初描認得游蹤花驄不住嘶驕梅

稍一寸殘紅炬喜尚堪移照櫻桃醉醺醺不記元  
宵只道花朝

春夏兩相期

壽謝令人

聽深深謝家庭館東風對語雙燕似說朝來天上婺  
星光現金裁花誥紫泥香繡裏藤輿紅茵軟散蠟  
宮輝行鱗厨品至今人羨 西湖萬柳如線料月  
仙當此小停颺輦付與長年教見海心波淺縈雲  
玉佩五侯門洗雲華桐三春苑慢拍調鶯急鼓催  
鸞翠陰生院

念奴嬌

薛稼堂

稼翁居士有幾多抱負幾多聲價玉立繡衣霄漢表  
曾覽八州風化進退行藏此時正要一着高天下  
黃埃撲面不成也控羸馬 人道雲出無心纔離  
山後豈是無心者自古達官酣富貴往往遭人描  
畫只有青門種瓜閑客千載傳佳話稼翁一笑吾  
今亦愛吾稼

絳都春

春愁怎盡正鶯背帶綠醅醺花謝細雨院深淡月廊  
斜重簾挂歸時記約燒燈夜早拆盡秋千紅架縱  
然歸近風光又是翠陰初夏 姪姪嚙青絃白恨

玉佩罷舞芳塵凝  
樹幾擬倩人付與  
蘭香秋羅帕  
知他墮策斜攏馬  
在底處垂楊樓下  
無言暗擁嬌  
鬢鳳釵溜也

聲聲慢

秋聲

黃花深巷紅葉低  
窓淒涼一片秋聲  
豆雨聲來中間  
夾帶風聲踈踈二  
十五點麗譙門不  
鎖更聲故人  
遠問誰搖玉佩簷  
底鈴聲彩角聲吹  
月墮漸連  
營馬動四起笳聲  
閃鑠鄰燈燈前尚  
有砧聲知他  
訴愁到曉碎嘒嘒  
多少葦聲訴未了  
把一半分與  
鴈聲

尾犯 寒夜

夜倚讀書床敲碎唾壺燈暈明滅多事西風把齋鈴  
頻掣人共語温温芋火鴈孤飛蕭蕭檜雪徧欄杆  
外萬頃魚天未了予愁絕 鷄邊長劍舞念不到  
此樣豪傑瘦骨稜稜但淒其衾鐵是非夢無痕堪  
記似雙瞳續紛翠纈浩然心在我逢着梅花便說

滿江紅

一掬鄉心付杳杳露莎烟葦來相伴淒然客影謝他  
窮鬼新綠舊紅春又老少玄老白人生幾况無情  
世故盪摩中凋英偉 詞場筆行群蟻戰場胃臆

群蟻問何如清晝倚藤凭棊

書壺酒船頭尾任垂涎斗大印黃金狂周顛

又

秋本無愁柰客裏秋偏岑寂身老大收敲秦缶懶移  
陶甕萬誤曾因踈處起一閑且向貧中覓笑新來  
多事是征鴻聲嘹唳雙戶掩孤燈剔書束架琴  
懸壁笑人間無此小窓幽闥浪遠微聽葭葉響雨  
殘細數梧桐滴正是依稀夢到故人家誰橫笛

探芳信

菊

翠岑峭似有人黃裳孤竚埃表漸老侵芳歲識君恨

不  
早  
料  
應  
陶  
令  
吟  
魂  
返  
凝  
此  
秋  
香  
妙  
傲  
霜  
姿  
尚  
想  
前  
身  
倚  
窓  
餘  
傲  
回  
首  
醉  
年  
少  
控  
駿  
馬  
蓉  
邊  
紅  
暉  
茸  
帽  
淡  
泊  
東  
籬  
有  
誰  
肯  
夢  
飛  
到  
正  
襟  
三  
誦  
悠  
然  
句  
聊  
遣  
花  
微  
笑  
酒  
休  
賒  
醒  
眼  
看  
花  
更  
好

梅花引

荆溪阻雪

白鷗問我泊孤洲是身留是心留心若留時何事鎖  
眉頭風拍小簾燈暈舞對閒影冷清清憶舊游  
憶舊游舊游今在否花外樓柳下舟夢也夢也夢  
不到寒水空流漠漠黃雲濕透木綿裘都道無人  
愁似我今夜雪有梅花似我愁



洞仙歌

對雨思友

世間何處最難忘  
杯酒唯是停雲想  
親友此時無一  
盞千種離愁  
西風外長伴枯荷衰柳  
去年深夜  
語傾倒書窓燭心懸  
小紅豆記得到門時  
雨正蕭蕭  
嗟今雨此情非舊  
待與子相期採黃花  
又宋上  
重陽果能晴否

又柳

枝枝葉葉受東風  
調弄便是鶯穿也  
微動自鵝黃千  
萬縷數到飛綿閑  
無事誰管將春迎送  
輕柔心  
性在教得游人  
酒舞花吟恣狂縱  
更誰家鸞鏡裏

貪學織蛾移來傍粧樓新種總不道江頭鎖清愁  
正雨渺煙茫翠陰如夢

最高樓 催春

新春景明媚在何時宜早不宜遲軟塵巷陌青油憶  
重簾深院畫羅衣要些兒晴日照煖風吹 一片  
片雪兒休要下一點點雨兒休要洒纔恁地越愆  
期悠悠不赴梅花到匆匆枉帶柳花飛倩黃鶯將  
我話報春歸

祝英臺 次韻

柳邊樓花下館低捲綉簾半簾外天絲擾擾似情亂

知他蛾綠纖眉鵝黃小袖在何處閑遊閑翫最  
堪嘆箏面一寸塵深玉柱網斜鴈譜字紅蕙剪燭  
記同看幾回傳語東風將愁吹去怎柰向東風不  
管

風入松

戲人去妾

東風方到舊桃枝仙夢已雲迷畫闌紅子檣蒲處依  
然是春晝簾垂恨殺河東獅子驚回海底鷗兒  
尋芳步莫嫌遲此去却慵移斷腸不在分襟後元  
來在襟未分時柳岸猶携素手蘭房早揜朱扉

解佩令

春

春晴也好春陰也好著些兒春雨越好春雨如絲綉  
出花枝紅裊怎禁他孟婆合早 梅花風小杏花  
風小海棠風驀地寒峭歲歲春光被二十四風吹  
老棟花風爾且慢到

一剪梅

宿龍游朱氏樓

小巧樓臺眼界寬朝捲簾看暮捲簾看故鄉一望一  
心酸雲又迷漫水又迷漫 天不教人客夢安昨  
夜春寒今夜春寒梨花月底兩眉攢敲遍欄杆拍  
遍欄杆

又 舟過吳江

一片春愁待酒澆江上舟搖樓上帘招秋娘容與泰  
娘嬌風又飄飄雨又蕭蕭何日歸家洗客袍銀

字笙調心字香燒流光容易把人拋紅了櫻桃綠

了芭蕉

何日歸家洗客袍一本  
作何日雲帆卸蒲橋

糖多令 壽東軒

秋碧瀉晴灣樓臺雲影閑記仙家元在蓬山飛到鴈  
峯塵更少三萬頃玉無邊金盞倒垂蓮歌搖香  
霧鬢任芙蓉月轉朱闌天氣已涼猶未冷重九後  
小春前

柳梢青 有談旧倡潘氏

小飲微吟殘燈斷雨靜戶幽窓幾度花開幾番花謝  
又到昏黃 潘娘不是潘郎料應也霜黏鬢傍鷓  
鴒闌空鴛鴦壺破烟渺雲茫

阮郎歸

客中思馬跡山

雪飛燈背鴈聲低寒生紅被池小屏風畔立多時閑  
看番馬兒 新搵淚舊題詩一般羅帶垂瓊蕭夜  
夜挾愁吹梅花知不知

金蕉葉

秋夜不寐

雲褰翠幙滿天星碎珠迸索孤蟾闌外照我看看過  
轉角酒醒寒砧正作待眠來夢魂怕惡枕屏那更

畫了平沙斷鴈落

憶秦娥

閩閩

山無限登山試望吳宮殿  
吳宮殿是藏深塢是臨清  
淺









昭君怨

簾外一聲聲叫簾裏鴉鬢入報問道買梅花買  
桃花

如夢令

夜月溪篁鸞影曉露岩花鶴頂半世踏紅塵到底輸  
他村景村村景村景樵斧耕簑漁艇

小重山

晴浦溶溶明斷霞樓臺搖影處是誰家銀紅裙襖皺  
紗風前坐閑鬪鬱金芽人散樹啼鴉粉團黏不  
住舊繁華雙龍尾上月痕斜而今照冷淡白菱花

又

曾伴芳卿鏘珮環西風吹夢斷墮人寰假饒無分入  
雕闌窺粧鏡也合小溪灣 此地有誰怜斜陽牛  
卧處牧童攀勸花休苦恨天天從來道薄命是朱顏

白苧

正春晴又春冷雲低欲落瓊苞未剖早是東風作惡  
旋安排一雙銀蒜鎮羅幙幽壑水生漪皺嫩綠潛  
鱗初躍愔愔巷門桃樹紅纔約畧知甚時霽華烘  
破青青萼 憶昨引蝶花邊近來重見身學垂楊  
瘦削問小翠眉山爲誰攢却斜陽院宇任蛛絲罥

遍玉箏絃索戶外惟聞放剪刀聲深在粧閤料想  
裁縫白苧春衫薄

蝶戀花

風蓮

我愛荷花花最軟錦拶雲挨柔柔嬌如顫一陣微風  
來自遠紅低欲蘸涼波淺莫是羊家張靜婉抱  
月飄煙舞得腰肢倦偷把翠羅香被展無眠却又  
頻翻轉

虞姬

梳篦

絲絲楊柳絲絲雨春在溟濛處樓兒忒小不藏愁幾  
度和雲飛去覓歸舟天怜客子鄉關遠借與花

消遣海棠紅近綵欄杆繞捲朱簾却又晚風寒

又聽雨

少年聽雨歌樓上紅燭昏羅帳壯年聽雨客舟中江  
闊雲低斷鴈叫西風而今聽雨僧廬下鬢已星  
星也悲歡離合總無情一任堦前點滴到天明

南鄉子

泊鴈小汀洲冷淡湔裙水漫秋裙上唾花無覓處重  
游隔柳唯存月半鉤準擬架層樓望得伊家見  
始休還怕粉雲天未起悠悠化作相思一片愁

又塘門元宵

翠幃夜游車不到山邊與水涯隨分紙燈三四盞鄰  
家便做元宵好景誇 誰解倚梅花思想燈毬墜  
絳紗舊說夢華猶未了堪嗟纔百餘年又夢華

步蟾宮

木犀

綠華剪碎嬌雲瘦賸粧點菊前蓉後涓涓月也染成  
香又何況纖羅襟袖 秋窓一夜西風驟翠奩鎖  
瓊珠花縷人間富貴總腥羶且和露攀花三嗅

又

玉窓掣鎖香雲漲喚綠袖低敲方響流蘇拂處字微  
訛且斜倚紅梅一餉 濛濛月在簾衣上做池館

春陰模樣春陰模樣不如晴這催雪曲兒休唱

玉樓春

桃花灣馬跡

秦人占得桃源地說道花深堪避世桃花灣內豈無  
花呂政馬來攔不住 明朝與子穿花去去看霜  
蹄剜石處茫茫秦事是耶非萬一問花花解語

戀綉衾

舊金小袖花下行過橋亭倚樹聽鶯被柳線低縈鬢  
紺雲垂釵鳳半橫 紅薇影轉晴窓書漾蘭心未  
到綉綉柰一點春來恨在青娥彎處又生

浪淘沙



人愛曉粧鮮我愛粧殘翠釵扶住欲歌鬟印了夜香  
無事也月上涼天 新譜學箏難愁湧蛾彎一床  
衾浪未紅翻聽得人催佯不采去洗珠鈿

又重九

白露浴踈桐秋滿簾櫳揜琴無語意忡忡搯破東窓  
窺皓月早上芙蓉 前事渺茫中烟水孤鴻一樽  
重九又成空不解吹愁吹帽落恨殺西風

燕歸梁

風蓮

我夢唐宮春晝遲正舞到曳裾時翠雲隊仗絳霞衣  
慢騰騰手雙垂 忽然急鼓催將起似綵鳳亂驚

飛夢回不見萬瓊姬見荷花被風吹

步蟾宮

中秋

去年雲揜冰輪皎喜今歲微陰俱掃乾坤一片玉琉璃  
怎算得清光多少無歌無酒癡頑老對愁影  
番嫌分曉天公元不負中秋我自把中秋誤了

南鄉子

冷淡是秋花更比秋花冷淡此到處芙蓉供醉賞從  
他自有幽人處士誇寂寞兩三葩盡日無風也  
帶斜一片西窓殘照裏誰家捲却湘裙薄薄紗

行香子

舟宿蘭灣

紅了櫻桃綠了芭蕉送春歸客尚蓬飄昨宵穀水今  
夜蘭皋柰何雲溶溶風淡淡雨瀟瀟 銀字笙調  
心字香燒料芳踪乍整還凋待將春恨都付春潮  
過窈娘堤秋娘渡秦娘橋

粉蝶兒

殘春

啼鴉聲中春光化成春夢問東君仗誰詩送燕伶晴  
鶯愛煖一窓芳哄柰匆匆催他柳綿狂縱 輕羅  
扇小桐花又飛么鳳記寒吟沁梅霜凍古今人易  
老莫閑雙鞦尚堪遊茶蘼粉雲香洞

翠羽吟

響林王君 本示予越調小梅花引俾呂飛仙步

虛之意爲其辭予謂泛泛言仙侶乎寡味越調

之曲與梅花宜羅浮梅花真仙事也演而成章

名翠羽吟

紺露濃映素空樓觀峭玲瓏粉凍霽英冷光搖蕩古  
青松半規黃昏淡月梅氣山影溟濛有麗人步依  
脩竹瀟然態若游龍 綃袂微皺水溶溶仙莖清  
瀟淨洗斜紅勸我浮香桂酒環珮暗解聲飛芳靄  
中弄春弱柳垂絲慢按翠舞嬌童醉不知何處驚  
剪剪淒緊霜風夢醒尋痕訪蹤但留殘星挂穹梅

花未老翠羽震吟一片曉峯

賀新郎

鄉士以狂得罪賦此餞行

甚矣君狂矣想胸中些兒磊砢酒澆不去據我看來  
何所侶一侶韓家五鬼又一侶楊家風子恠鳥啾  
啾鳴未了被天公捉在樊籠裏這一錯鉄難鑄  
濯溪雨漲荆溪水送君歸斬蛟橋外水光清處世  
上恨無樓百尺裝著許多俊氣做弄得栖栖如此  
臨別贈言朋友事有殷勤六字君聽取節飲食慎  
言語

又彈琵琶者

妾有琵琶譜抱金槽慢撚輕拋柳梢鶯妬羽調六么  
彈遍了花底靈犀暗度柰敲斷玉釵纖股低畫屏  
深朱戶揜捲西風滿地吹塵土芳事往蝶空訴  
天天把妾芳心誤小樓東隱約誰家鳳簫鼉鼓泪  
點染衫雙袖翠脩竹淒其又暮背燈影蕭條情互  
捐佩洲前裙步步渺無邊一片相思苦春去也亂  
紅舞

又 題後院畫像

綠墮雲垂領背琵琶盈盈裹手粉間紅靚依約春游  
歸來倦又伴春眠未醒灑寒波低迷蓉影鶯帶鬆

聲飛過也柳窗深尚記停針聽魂浩蕩孤芳景  
金釵斷股餅沉井問蘇城香銷卷子倩誰題詠燈  
暈青紅殘醉在小院屏昏帳暝誤嗔恠眉心慵整  
人道真真招得下任千呼萬喚無言應空對此泪  
花冷

摸魚子

躡吟鞭鴈峰高處曾游長壽仙府年年長見瑤簪會  
霞抄蓋芝輜度開綉戶芙蓉萬朶香紅賸染秋光  
素清蕭麗鼓任艷玉杯深鸞酣鳳醉猶未洞天暮  
塵緣誤迷却桃源舊步飛瓊芳夢同賦朝來聞

道仙童宴翹首翠房玄圃雲又霧身恍到微茫認  
得胎禽舞遙汀近浦便一葦漁航撐煙載雨歸去  
伴寒鷺

沁園春 壽岳君舉

昔裴晉公生甲辰歲秉唐相鈞向東都治第才娛老  
眼北門建節又絆間身燠館花濃涼臺月淡不記  
弓刀千騎塵誰堪羨南塘居士做散仙人 南塘  
水向晴雲三百樹鳳洲楊柳春有綠衣奏曲金斜  
小鴈綵衣勸酒玉跪霞麟前後同年逸勞異趣中  
立番成雌甲辰斯言也是梅花說與竹里山民



喜遷鶯 金村阻風

風濤如此被閑鷗  
謂我君行良苦  
檝葉深灣蘆窠窄  
港小憩倦篙慵  
櫓壯年夜吹笛去  
驚得魚龍嗥舞  
悵今老但蓬窓緊  
拚荒涼愁愫  
別浦雲斷處  
低鴈一聲繩欄斷  
家山路佩玉無詩  
飛霞乏序滿席  
快飈誰付醉中  
幾番重九合度  
芳樽辜負便晴否  
怕明朝蝶冷黃  
花秋圃

又

晴天寥廓被孤雲  
盡出離愁消索  
玉局彈碁金釵剪  
燭芳思可勝  
搖落鏡妝為慵  
遲晚笙曲綠愁  
差錯

倒纖指指從頭細數年時同樂 寂寞花院悄昨夜  
醉眠夢也難憑託車角生時馬足方後纔始斷  
漂泊悶無半分消遣春又一番擔閣倚闌久柰東  
風忒冷紅綃單薄

齊天樂

元夜闋夢華錄

銀蟾飛到舩稜外娟娟下窺龍尾電紫鞘輕雲紅篋  
曲雕玉輿穿燈底峯繒岫綺佛一族人聲道隨竿  
媚侍女迎鑾燕嬌鶯詫炫珠翠 華胥仙夢未了  
被天公傾洞吹換塵世淡柳湖山濃花巷陌惟說  
錢塘而已回頭汴水望當日宸遊萬里發處但有

寒蕪夜深青燐起

念奴嬌

夢有秦方響而舞者

夜深清夢到叢花  
深處滿襟冰雪人在  
墻雲方響樂  
杳杳衝牙音絕  
翠箕翔龍金樅躍鳳  
不是麤賓鉄  
淒鏘仙調風敲珠樹  
新折中有五色光開  
參差  
幘影對舞山香徹  
霧閣雲窓歸去也  
笑擁靈君旌  
節六曲闌干一聲  
鸚鵡霍地空花滅  
夢回孤館秋  
笳霜外嗚咽

應天長

次清真韻

柳湖載酒梅墅賒  
棋東風袖裹寒色  
轉眼翠龍池閣

含櫻薦鶯食匆匆過春是客弄細雨晝陰生寂侶  
瓊花滴下紅裳再返仙籍 無限倚闌愁夢斷雲  
蕭鶻叫度青壁謾有戲龍盤盈盈住花宅驕驄馬  
嘶巷陌戶半掩墮鞭無迹但追想白苧裁縫燈下  
初識

賀新郎 隲括杜詩

絕代幽人獨拚芳姿深居何處亂雲深谷自說關中  
良家子零落聊依草木世喪敗誰收骨肉輕薄兒  
郎爲夫婿愛新人窈窕顏如玉千萬事風前燭  
鴛鴦一旦成孤宿最堪憐新人歡笑舊人哀哭待

婢賣珠回來後相與牽蘿補屋謾采得拍枝盈掬  
日暮山中天寒也翠綃衣薄甚肌生粟空斂袖倚  
脩竹

玉漏遲

壽東軒

客牕空翠杪前生飲慣長生瓊醪回首紅塵換了

花幙草隔水神仙洞府但只有飛霞能到誰信道

西風送我還陪清嘯縹緲柳側霞樓正綉幙圍

春露深烟悄魚尾傍時雪上鬢雲猶少醉傍芙蓉

自語願來此年年簪帽青嶼小鶴立淡煙秋曉

又

傅隱岩木如武林納俗堂徐氏女子於客樓其

得也亦貯之所居樓上而圖西湖景於樓壁

翠鴛雙穗冷鶯聲喚轉春風芳景花湧袖香此度徐  
粧偏稱水月仙人院宇到處有西湖如鏡煙岫暝  
纖葱誤指蓮峰篁嶺料想小閣初逢正浪拍紅  
猊袖飛金餅樓倚斜暉暗把佳期重省萬種惺鬆  
笑語語一點溫柔情性釵倦整盈盈背燈嬌影

高陽臺江陰道中有懷

宛轉怜香徘徊顧影臨芳更倚苔身多謝殘英飛來  
遠遠隨人回頭却望晴簷下等幾番小摘微薰到

而今獨裊鞭梢笑不成春  
愁吟未了煙林曉有  
垂楊夾路也爲輕輦今夜山窓還是費繞梨雲行  
囊不是吳牋少問倩誰去寫花真待歸時葉底紅  
肥細雨如塵

探春令

玉窓蠅字記春寒滿茸絲紅處畫翠鴛雙展金蠅翅  
未抵我愁痕膩芳心一點天涯去絮濛濛遮住  
舊對花彈玩織瓊指爲粉靨空彈淚

秋夜雨

秋夜

黃雲水驛秋笳噎吹人雙鬢如雪愁多無柰處謾碎

把寒花輕撚 紅雲轉入香心裏  
夜漸深人語初歇 此際愁更別  
鴈影落西窓斜月

又 蔣正夫令作春夏冬各一闋次前韻

金衣露濕鶯喉噎 春情不解分雪寶  
箏絃斷盡但萬縷閑愁難撚  
長紅小白誰亭館 過禁煙彈指芳  
歇今夜休要別且醉宿細桃花月

驟車轉急風如噎 冰絲鬆藕新雪有人涼  
滿袖怕汗濕紅綃猶撚  
三更夢斷敲荷雨 細聽來踈點還  
歇茉莉標致別占斷了紗厨香月

紅麟不暖餅笙噎 爐灰一片晴雪醉  
無香嗅醒但手



把新橙閑搯 更深凍損梅花也聽畫堂簫鼓方  
歇想是天氣別豫借與春風三月

少年游

梨邊風緊雪難晴千點照溪明吹絮窓低唾茸窓上  
人隔翠陰行而今白鳥橫飛處煙樹渺鄉城兩  
袖春寒一襟春恨斜日淡無情

又

楓林紅透晚煙青客思滿鷗汀二十年來無家種竹  
猶借竹爲名春風未了秋風到老去萬緣輕只  
把平生閑吟閑詠譜作擢歌聲

柳梢青 游女


學唱新腔秋遷架上釵股敲雙柳  
雨花風翠鬆裙摺  
紅膩鞋幫 歸來門揜銀缸  
淡月裏踈鍾漸撞嬌  
欲人扶醉嫌人問斜倚樓窓

霜天曉角

人影窓紗是誰來折花折則從他折去  
知折去向誰  
家簷牙枝最佳折時高折些說與折花人  
道須插  
向鬢邊斜

乙巳春季假錫山劍光閣本校閱一過

景宗本後村居士詩餘二卷



景宋本續編正

士醜餘二卷



後村居士集卷第十九

詩餘

哨遍

昔坡公以盤谷序配歸來詞然陶詞既隳括入律韓序則未也暇日游方氏龍山別墅試效顰為之俾主人刻之崖石云

勝處可宮平處可田泉土尤甘美深復深路絕住人稀  
有人兮盤旋於此送子歸是他隱居求志是要明主媒  
當世嗟此意誰論其言甚壯孔顏猶有遺旨大丈夫之  
被遇于時入則坐廟朝出旗麾列屋名姬夾道武夫滿  
前才子噫有命存焉吾非惡此而逃之富貴人所欲  
如之何幸而致向茂樹堪休清泉可濯谷中別有閑天

地况鱸細於絲蕨甜似蜜采於山釣於水大丈夫不遇  
之所爲唐處士依稀是吾師覺山林尊如朝市五侯門  
下賓客擾擾趨形勢嗟盤之樂誰爭子所占斷千秋萬  
歲呼僮秣馬更膏車便與君從此逝矣

六州歌頭

客贈  
牡丹

維摩病起兀坐等枯株清晨裏誰來問是文殊遣名姝  
奪盡羣花色浴纜出醞初解千萬態嬌無力困相扶絕  
代佳人不入金張室却訪吾廬對茶鐺禪榻笑殺此翁  
臞珠髻金盞始消渠憶承平日繁華事修成譜寫成  
圖竒絕甚歐公記蔡公書古來無一自京華隔問姚魏



竟何如多應是彩雲散却灰餘野鹿銜將花去休迴首  
河洛丘墟謾傷春吊古夢繞漢唐都歌罷欵欵

賀新郎

吾少多奇節頗擲揄玉關定遠壺頭新息一劍防身行  
萬里選甚南溟北極看塞鴈銜來秋色不但槩棋夸妙  
手管城君亦自無勅敵終賈輩恐難匹酒腸詩膽新  
來窄向西風登高望遠亂山斜日安得良弓并快馬聊  
與諸公角力漫醉把闌干頻拍莫恨寒蟬離海晚待與  
君秉燭游今夕歡易買健難得

賀新郎

送陳倉部  
知真州

北望神州路試平章這場公事怎生分付記得太行山  
百萬曾入宗爺駕馭今把作握蛇騎虎君去京東豪傑  
喜想投戈下拜真吾父談笑裏定齊魯 兩河蕭瑟惟  
狐兔問當年祖生去後有人來否多少新亭揮淚客誰  
夢中原塊土算事業湏由人做應笑書生心膽怯向車  
中閉置如新婦空目送塞鴻去

賀新郎

杜子昕  
凱歌

盡說番和漢這琵琶依稀似曲騫然絃斷作麼一年來  
一度欺得南人技短歎幾處城危如卯元凱後身居玉  
帳報 休作尋常看布嚴令運竒筭 開門決闕雌

雄判笑中宵奚車氈屋獸驚禽散箇箇魏冠橫塵柄誰  
了君王此段也莫靠長江能限不論周郎并幼度便仲  
厓復起嗟微管馳露布築京觀

賀新郎

跋唐伯玉奏藁

宣引東華去似當年文皇親擢馬周徒步殿上風霜生  
白簡下殿扁舟已具恁不與官家留住古有一言腰相  
印誰教他滿篋嬰鱗疏還笏退不迴顧 新來邊報猶  
飛羽問諸公可無長策少寬明主攀檻朱雲頭雪白流  
落如今底處但一片丹心如故賴有越臺堪眺望那中  
原莫已平安否風色惡海天暮

賀新郎

送唐伯玉還朝

驛騎聯翩至道臺家籌邊方急酒行姑止作麼携將琴  
鶴去不管州人墮淚富與貴平生無味可但紅塵難着  
脚便山林未有安身地搔白髮兀相對 前身小范疑  
公是憶當年天章閣上建明尤偉慶曆諸賢方得路便  
不容他老子須著放延州城裏一句殷勤牢記取在朝  
廷最好圖西事何必向玉關外

賀新郎

送黃成父還朝

飛詔從天下道中朝名流欲盡君王思賈時事祗今堪  
痛哭未可徐徐俟駕好着手扶將宗社多少法筵龍象

衆聽靈山祝付些兒話千百世要傳寫 子方行矣乘  
驄馬又送它江南太史去游瓊厦老我伴身惟有影倚  
徧風軒月榭悵玉手何時重把君向柳邊花底問看貞  
元朝士誰存者桃滿觀幾開謝

賀新郎

戊戌壽張史君  
九月十八日

南國秋容晚曉寒輕芙蓉臺榭拒霜池館試向壺山堂  
上望萬頃黃雲刈遍總喫着君侯方寸不要漢庭誇擊  
斷要史家編入循良傳春脚到福星現 家家香火人  
人願要還它慶元絨座建炎蟬冕穩奉安輿迎兩國誰  
謂山遙水遠福壽比河沙難算來歲而今黃花節早驂

鷺入侍瑤池宴風浩蕩海清淺

賀新郎 端午

深院榴花吐盡簾開練衣紈扇午風清暑兒女紛紛夸  
結束新樣釵符艾虎早已有游人觀渡老大逢場慵作  
戲任陌頭年少爭旗鼓溪雨急浪花舞靈均標致高  
如許憶生平既紉蘭佩更懷椒糝誰信騷魂千載後波  
底垂涎角黍又說是蛟饞龍怒把似而今醒到了料當  
年醉死差無苦聊一笑吊千古

賀新郎 九日

湛湛長空黑更那堪斜風細雨亂愁如織老眼平生空

四海賴有高樓百尺看浩蕩千崖秋色白髮書生神州  
淚儘淒涼不向牛山滴追往事去無迹少年自負凌  
雲筆到而今春華落盡滿懷蕭瑟常恨世人新意少愛  
說南朝狂客把破帽年年拈出若對黃花孤負酒怕黃  
花也笑人岑寂鴻北去日西匿

賀新郎

寄題聶侍  
郎鬱孤臺

絕頂規危榭跨高寒鳥飛不過雲生其下斤斲無聲人  
按堵翕芻青紅變化覽城郭山川如畫閣老鳳樓修造  
手笑談間突出凌雲廈臺上景買無價唾壺麈尾登  
臨暇似當年滁陽太守歐陽公也傾倒贛江供硯滴判

斷雪天月夜更喚  
鄒枚司馬銅雀凌敲歌舞散訪殘  
磚斷甃無存者餘翰墨被風雅

賀新郎

動地東風起盡橋西遶溪桑柘漫山桃李寂寂墻陰蒼  
苔逕猶印前田履齒驚歲月飈馳雲駛太息攀翻長亭  
樹是先生手種今如此君不樂欲何俟 傍人錯會淵  
明意笑斯翁皇皇汲汲登山臨水佳處徑呼籃輿去髣  
髴柴桑粟里從我者門生兒子嘗試平章先賢傳屈原  
醒不似劉伶醉判醕酹臥花底

賀新郎

宋庵  
訪梅



鵲報千林喜還猛省謝家池館早寒天氣要與瑤姬叙  
離索草草杯盤籍地悵減盡何郎才思不願玉堂并金  
屋願年年歲歲花間醉餐秀色挹高致西園飛蓋東  
山妓問何如半山雪裏孤山烟外管甚夜深風露冷人  
與長綰共睡任翠羽枝頭多事老子平生無他過爲梅  
花受取風流罪簪白髮莫教墜

賀新郎

溪上收殘雨倚盡欄薄綿乍脫日陰亭午鬧市不知春  
色亂散在荒園廢墅漸小白長紅無數客子雖非河陽  
今也隨緣暫作鴛花主那可負甕中醕碧雲四合千

巖暮恨匆匆余方有事子姑歸去趁取群芳未搖落  
暇日提魚就煮歎激電光陰如許回首明年何處在問桃  
花尚記劉郎否公莫笑醉中語

賀新郎

和人詠  
荼蘼

曾與瑤姬約恍相逢翠裳摇曳珠鞦聯絡風露青冥非  
人世攬結玉龍驂鶴愛萬朶千條纖弱禱祝花神憐惜  
取到開時晴雨須斟酌枝上雪莫銷却 惱人匹似中狂  
藥凭危欄燭光交映樂聲遙作身上春衫香熏透看到  
參橫月落筭茉莉猶低一着坐有緱山王郎子倚玉簫  
度曲難為酢君不飲鑄成錯

賀新郎

用前韻賦  
黃茶藤系

想赴瑤池約向東風名姬駿馬翠鞵金絡太液池邊鵲  
羣下又似南樓呼鶴盡不就穠纖嬌弱羅帕封香來天  
上瀉銅盤沆瀣供清酌春去也被留却 芳魂再反應  
無藥似詩詠綠衣黃裏感傷而作愛惜尚嫌蜂採去何  
况流鶯蹴落且放下珠簾遮着除却江南黃九外有何  
人敢與花酬酢君認取莫教錯

賀新郎

再用  
約字

淺把宮黃約細端相普陀煙裏金身珠絡萼綠華輕羅  
鞵小飛下祥雲仙鶴朶朶賽蜂腰纖弱已被色香撩病

思儘鵝兒酒美無多酌者不足怕殘却 人間難得傷  
春藥更枝頭流鶯喚起少年狂作留取姚家花相伴羞  
與萬紅同落未肯讓蠟梅先着樂府今無黃絹手問斯  
人清唱何人醉休草草認題錯

賀新郎

客贈  
芍藥

一夢揚州事盡堂深金瓶萬朶元戎高會座上祥雲層  
層起不減洛中姚魏歎別後關山迢遞國色天香何處  
在想東風猶憶狂書記驚歲月一彈指 數枝清曉煩  
馳騎向小牕依稀重見蕪城妖麗料得花憐儂銷瘦儂  
亦憐花憔悴漫悵望竹西歌吹老矣應無騎鶴日但春

衫點點當時淚那更有舊情味

賀新郎

郡宴和韻

草草池亭宴又何須珠鞵絡臂琵琶遮面賓主一時詞  
翰手倏忽龍蛇滿案傳寫處塵飛鷺轉但得時平魚稻  
熟這腐儒不用青精飯陰霧掃霽華見使君償了豐  
年願便從今也無敲朴也無厨傳試拂籠紗看壁記幾  
箇標名渠觀想九牧聞風爭羨此老飽知民疾苦早歸  
來載筆薰風殿詩有諷賦無勸

賀新郎

再和前韻

夢斷鈞天宴恠人間曲吹別調局翻新面不是先生瘖

文  
十  
八  
啞了怕殺烏臺舊案但掩耳蟬嘶禽囀老去把茅依地  
主有瓦盆盛酒荷包飯停造請免朝見 少狂誤發功  
名願苦貪他生前死後美官佳傳白髮歸來還自笑管  
轄希夷古觀看一道水街堪羨妃子將軍嗔未已問匡  
山何似金鑾殿休更待杜鵑勸

賀新郎

題蒲澗寺

風露驅炎毒記仙翁飄然謫墮吹笙騎鵠歷歷漢初秦  
季事山下瓜猶未熟過眼見群雄分鹿想得拂衣游汗  
漫試回頭劉項俱蠻觸斫鯨鱸脯鱗肉 越人好事因  
成俗擁遨頭如雲士女山南山北問訊先生無恙否齊

魯干戈滿目且遊戲扶胥黃木不是世無瓜樣棗便有  
來肯飽癡兒腹聊奉酒笑相屬

賀新郎

王實之喜予出嶺命愛姬  
歌新詞以相勞輒次其韻

此腹元空洞少年時諸公過矣上天吹送老大被它禁  
害殺身與浮名孰重這鼓笛休休拈弄綵筆擲還殘錦  
去用江淹  
鮑昭事願今生來世無妖夢且飮犢莫吞鳳 新來  
喑啞如翁仲羨王郎驟鸞縹緲玉簫吹動應笑夔州村  
裏妾表面生愁進奉要絕代傾城安用今古何人知此理  
有吾家酒德先生頌三萬卷謾充棟

賀新郎

蒙恩主崇禧  
再用前韻

主判茅君洞有簷間杳杳喜鵲曉來傳送幾度黃符披

戴了此度君恩越重

僕五任祠廟一南岳二仙都三玉局四雲臺五崇禧

被賀監

天隨調弄做取散人千百歲笑渠儂一霎邯鄲夢歌而

過鳳兮鳳

灌園織屨希陳仲問先生加齊卿相可無

心動除却醴泉中太乙揀箇名山自奉那捷徑輸它藏

用有耳不曾聞黜陟免教人貶駁徂徠頌服蘭佩結茅

棟

賀新郎 三和

謫下神清洞更遭它揶揄黠鬼路傍遮送薄命書生雞

肋爾却笑尊拳忒重破故紙誰教繙弄一枕茅簷春睡



美便周公大聖何須夢門前客任題鳳  
卜隣羊仲并  
求仲願春來西疇雨足土膏犁動白髮巡官占歲稔不  
問京房翼奉棹與甕從今無用醉與老農同擊壤莫隨  
人投獻嘉禾頌在陋巷勝華棟

賀新郎

席上聞  
歌有感

妾出於微賤小年時朱絃彈絕玉笙吹遍粗識國風關  
雎亂羞辜流罵首嘖揔不涉閨情春怨誰向西隣公子  
說要珠鞍迎入梨花院身未動意先懶  
主家十二樓  
連苑那人人靚粧按曲繡簾初卷道是華堂簫管唱笑  
殺街坊拍袞迴首望侯門天遠我有平生離鸞操頗哀

而不愠微而婉聊一奏更三嘆

賀新郎

生日用實  
之來韻

鬢雪今千縷更休休癡心欲望故人明主晚李瞿聃無  
所得不解飛昇滅度侶曉鼓鼙鼙過五散尽朝來湯餅  
客且烹雞要飢茅容母怕迴首太行路 麟臺李士微  
雲句便尊前周郎復出審音無誤安得春鶯雪兒輩輕  
拍紅牙按舜也莫笑儂家蛮語老去山歌尤協律又何  
須手筆如燕許援琴操促箏柱

賀新郎

再用  
前韻

放逐身縊縷被門前羣鷗戲狎見推盟主若把士師三

黜比老子多他兩度袖手看名場呼五不會車邊望塵  
拜免它年青史羞潘母勾曲洞是歸路 平生怕道蕭  
蕭句况新來冠歌弁側醉人多誤管甚是非并禮法頓  
足低昂起舞任百鳥喧啾春語欲托朱絃寫悲壯這琴  
心脉脉誰堪許君按拍我調柱

賀新郎

實之三和有憂邊  
之語走筆答之

國脉微如縷問長纓何時入手縛將戎主未必人間無  
好漢誰與寬些尺度試看取當年韓五豈有穀城公付  
授也不干曾遇驪山母談笑起兩河路 少時棋枰曾  
聯句歎而今登樓攬鏡事機頻誤聞說北風吹面急邊

文 十一  
上衝梯屢舞君莫道投鞭虛語自古一賢能制難有金  
湯便可無張許快投筆莫題柱

賀新郎

四用縷字韻  
為王實之壽

萬字如鍼縷憶王郎丹墀大對氣為文主貴近傍觀俱  
失色仰止如天聖度笑杜牧成名居五晚面清光猶苦  
諫似封人愾切言君母謫塵世錯行路 當時宜和薰  
風句又那知青雲一跌被才名誤輸與靈和殿前柳柔  
軟隨風學舞恠兩鳥新來停語不是先生高索價問何  
時宰相先生許舉杯祝莫傾柱

賀新郎

實之用前韻為  
老者壽賦答

身畔無絲縷但從前練裳練帨做他家主甲子一周加  
二紀兔走烏飛幾度賽孔子如來三五徐陵云小如來  
五歲多孔子三  
年鶴髮蕭蕭無可截要一杯留客慙陶母門外草欲迷  
路 朗吟白雪陽春句待夫君驪駒不至鵲聲還誤老  
去聊攀萊子例倒着班衣戲舞記田舍火爐頭語肘後  
黃金腰下印有高堂未敢將身許且扇枕莫倚柱

沁園春

夢方  
孚若

何處相逢登寶釵樓訪銅雀臺喚厨人斫就東溟鯨膾  
圍人呈罷西極龍媒天下英雄使君與操餘子誰堪共  
酒杯車千兩載燕南趙北劍客奇材 飲酣盡鼓如雷

文 十一  
誰信被晨雞輕喚回嘆年光過盡功名未立書生老去  
機會方來使李將軍遇高皇帝萬戶侯何足道哉披衣  
起但淒涼感舊忼慨生哀

沁園春

送孫季蕃弔方漕西歸

歲暮天寒一劍飄然幅巾布裘儘綠雲烏道躋攀絕頂  
拍天鯨浸笑傲中流疇昔竒君紫髯鐵面生子當如孫  
仲謀爭知道向中年猶未建節封侯南來萬里何求  
因感慨橋公成遠游嘆名姬駿馬都成昨夢隻雞斗酒  
誰弔新丘天地無情功名有命千古英雄只麼休平生  
客獨羊曇一箇灑淚西州

沁園春送包尉

我羨君歸一路秋風芙蓉木犀想慈顏望久靈烏乍噪  
新眉畫就郎馬頻嘶忙脫征衫快呼斗酒細爲家人說  
建谿爭知道這中年懷抱最怕分携 丈夫南北東西  
應笑殺離筵粉淚啼悵佳人來未碧雲冉冉王孫去後  
芳草萋萋明日相思山重水複古道入稀茅店雞元龍  
老有高樓百尺誰共登梯

沁園春

答九華葉賢良

一卷陰符二石硬弓百斤寶刀更玉花驄噴鳴鞭電抹  
烏絲欄展醉墨龍跳牛角書生虬鬚豪客談笑皆堪折

簡招依倚記曾請纓繫粵草檄征遼 當年目視雲霄  
誰信道淒涼今折腰悵燕然未勒南歸草草長安不見  
北望迢迢老去曾中有此磊砢歌罷猶須着酒澆休休  
也但帽邊鬢改鏡裏顏凋

沁園春

同前

我夢見君戴飛霞冠着宮錦袍與牧之高會齊山詩酒  
謫仙同載采石風濤萬卷星羅千篇電掃肯吝窮兒事  
楚騷掀髯嘯有魚龍鼓舞狐兔悲嗥 英雄埋沒蓬蒿  
誰摸索當年劉與曹歎事機易失功名難偶誅茅西崦  
種秫東臯柵有雞豚庭無羔鴈道是先生索價高人間



窄待相期海上共摘蟠桃

沁園春

癸卯佛生翌日將曉夢中作既醒但易數字

有箇頭陀形等枯株心猶死灰幸春山筍賤無人爭喫  
夜爐芋美與客同煨何處播花忽相導引莫是天宮迎  
赴齋又疑道向毗耶城裏講席初開 這邊尚自徘徊  
笑那裏紛紛早見猜有尊神奮杵拳龕似鉢名緇豎拂  
喝猛如雷老子無能山僧不會誰誤檀那奉請哉山中  
去便百千億劫休下山來

沁園春

和吳尚書叔永

我所思兮延陵季子別來九春笑是非浮論白衣蒼狗

文章定價秋月華星獨步岷峨後身坡穎何必荀家有  
二仁中朝裏看叔兮袞斧伯也絲綸 洛中曾識機雲  
記玉立堂堂九尺身歎苕溪漁艇幽人孤往鴈山馬鬣  
吊客誰經宣室釐殘玄都花謝回首舊游存幾人新腔  
美堪洗空恩怨喚起交情

沁園春

吳叔永尚書和  
予舊作再答

莫羨渠儂白玉成樓黃金築臺也不消顛恠騎麟被髮  
誰能委曲令鴛爲媒鬢有二毛袖閑雙手只了持螯與  
把盃公過矣賞陳登豪氣杜牧龕才 便煩問訊張雷  
甚斗宿無光劍不迴想閣中鳴佩時携客去壁間懸榻

近有誰來撤我虎皮讓君牛耳誰道兩賢相危哉中年  
後向歌闌易感樂極生哀

沁園春

推揚作

遼鶴重來不見繁華只見凋殘甚都無人誦何郎詩句  
也無人報書記平安閭里俱非江山畧是縱有高樓莫  
倚闌沉吟處但螢飛草際鴈起蘆間不辭露宿風餐  
怕萬里歸來雙鬢斑筭這邊贏得黑貂裘弊那邊輸了  
翡翠衾寒檄草流傳吟牋倚閣開到瓊花亦懶看君記  
取向中州差樂塞地無歡

摸魚兒

文一  
十一  
恠新年倚樓看鏡清狂渾不如舊暮雲千里傷心處那  
更亂蟬踈柳凝望久愴故國百年陵闕誰迴首功名大  
謬歎采藥名山讀書精舍此計幾時就 封侯事久矣  
輸人妙手滄洲聊作漁叟高冠長劍渾閑物世上切身  
惟酒千載後君試看拔山扛鼎俱烏有英雄骨朽問顧  
曲周郎而今還解來聽小詞否

摸魚兒

海棠

甚春來冷煙淒雨朝朝遲了芳信驀然作暖晴三日又  
覺萬株嬌困霜點鬢潘令老年年不帶看花分才情減  
盡悵玉局飛仙石湖絕筆辜負這風韻 傾城色懊惱

佳人薄命墻頭岑寂誰問東風日暮無聊賴吹得胭脂  
成粉君細認花共酒古來二事天尤吝年光去迅漫綠  
葉成陰青苔滿地做取異時恨

摸魚兒

用寶  
之韻

便披蓑荷鋤歸去何須身着宮錦與誰共話桑麻事朱  
老阮生尤稔篩樣餅甕樣爾畏長鬚赤脚供樵飪清流濁  
品盡掃去胷中置諸膜外對酒莫辭飲 華胥夢怕殺  
人驚曉枕踈牕惟月來闌一生常被弓旌誤且告朝家  
追寢愁箇甚君管取有薇堪采松堪蔭茆山再任幸不  
是謀臣又非世將免犯道家禁

一剪梅

袁州解印

陌上行人恠府公還是詩窮還是文窮下車上馬太匆  
匆來是春風去是秋風 階衙免得帶兵農嬉到昏鍾  
睡到齋鍾不消提嶽與知宮喚作山翁喚作溪翁

一剪梅

余赴廣東實之  
夜餞于風亭

東緼宵行十里強挑得詩囊拋了衣囊天寒路滑馬蹄  
僵元是王郎來送劉郎 酒酣耳熱說文章驚倒隣墻  
推倒胡床傍觀拍手笑踈狂踈又何妨狂又何妨

滿庭芳

記夢

涼月如水素濤翻雪人世依約三更扁舟乘興莫計水

雲程忽到一洲奇絕花無數多不知名渾疑是芙蓉城  
裏又似牡丹坪 蓬萊應不遠天風海浪涵目淒清更  
一聲鐵笛石裂龍驚回顧塵寰局促揮袂去散髮騎鯨  
遽遽覺元來是夢鍾動野雞鳴

鷓鴣天

腹疾困睡和  
朱希真詞

前度看花白髮郎平生痼疾是清狂幸然無事污青史  
省得教人奏赤章 遊俠窟少年場輸他羣謝與諸王  
居人不識庚桑楚弟子誰從魏伯陽

鷓鴣天

戲題周  
登樂府

詩變齊梁躰已澆香奩新製出唐朝紛紛競奏桑間曲

寂寂誰知爨下焦  
揮綵筆展紅綃十分峭措稱妖饒  
可憐才子如公瑾未有佳人敵小喬

卜筭子 惜海棠

盡是手成持合得天饒借風雨於花有底讎  
藉做暖逼教開做冷催教謝不負明年花下人  
只負栽花者

卜筭子 同前

片片蝶衣輕點點猩紅小道是天公  
不惜花百種千般巧朝見樹頭繁暮見枝頭少  
道是天公果惜花雨洗風吹了



卜筮子

亂似盜中絲密似風中絮行遍茫茫禹迹來底是無愁  
處 好客挽難留俗事推難去惟有翻身入醉鄉愁欲  
來無路

後村集卷第十九

後村居士集卷第二十

詩餘

滿江紅

金甲瑠戈記當日  
轅門初立磨盾鼻  
一揮千紙龍蛇猶  
濕鐵馬曉嘶營壁冷  
樓船夜渡風濤急  
有誰憐  
後臂故將軍無功級  
平戎策從軍什  
零落盡慵收拾把茶經  
香傳時時溫習生  
怕客談榆塞事  
且教兒誦花間集  
嘆臣之壯也不如人  
今何及

滿江紅

二月二十四夜  
飲海棠花下作

老子年來頗自許  
心腸鐵石尚一點  
消磨未盡愛花成

癖懊惱每嫌寒勒住丁寧莫被晴烘拆柰暄風烈日太  
無情如何得 張畫燭頻頻惜憑素手輕輕摘更幾番  
雨過彩雲無迹今夕不來花下飲明朝空向枝頭覓對  
殘紅蒲院杜鵑啼添愁寂

滿江紅

題梅谷

赤日黃埃夢不到清溪翠麓空健美君家別墅幾株幽  
獨骨冷肌清偏要月天寒日暮尤宜竹想主人杖屨繞  
千迴山南北 寧委澗嫌金屋寧映水羞銀燭歎出羣  
風韻背時裝束競愛東鄰姬傳粉誰憐空谷人如玉笑  
林逋何遜謾爲詩無人讀

滿江紅

送宋惠父  
入江西幕

滿腹詩書餘事到穰苴兵法新受了烏公書幣着鞭垂  
發黃紙紅旗喧道路黑風青草空巢穴向幼安宣子頂  
頭行方奇特谿峒事聽儂說龍龔遂外無長策便獻俘  
非勇納降非怯帳下健兒休盡銳草間赤子俱求活到  
崆峒快寄凱歌來寬離別

滿江紅

落日登樓誰管領倦游狂客待喚起滄浪漁父隔江吹  
笛看水看山身尚健憂晴憂雨頭先白對暮雲不見美  
人來遙天碧山中鶴應相憶沙上鷺渾相識想石田

茅屋草深三尺空有鬢如潘騎省斷無面見陶彭澤便  
倒傾海水浣衣塵難湔滌

滿江紅

送王實之

天壤王郎數人物方今第一談笑裏風霆驚座雲煙生  
筆落落元龍湖海氣琅琅董相天人策問如何十載尚  
青衫諸侯客 易愛底些官職難保底些名節擬閉門  
投轄劇談三日疇昔評君天下寶當為天下蒼生惜向  
臨分慷慨出商聲摧金石

滿江紅

壽王實之

鶴馭來時長占定一年清絕九萬里纖雲收盡帝青空

閣月露偏爲丹桂地風霜欲放黃花節聽玉笙縹緲度  
緜山吹初徹曾直把龍鱗批曾戲取鯨牙拔向絳河  
濯足咸池晞髮俗子底量吾輩事天仙不在臞儒列世  
豈無瑤草與蟠桃堪攀掇

滿江紅

和王實之韻  
送鄭伯昌

恹兩盲風留不住江邊行色煩問訊冥鴻高士釣鰲詞  
客千百年傳吾輩話二三子繫斯文脉聽王郎一曲玉  
簫聲淒金石晞髮處怡山碧垂釣處滄溟白笑而今  
拙宦它年遺直只願長留相見面未宜輕屈平生滕有  
狂談欲吐且休休驚鄰壁

滿江紅

四首並和實之

往日封章曾聳動君王玉色今似得三閭公子四明狂  
客古不能箝言者口天方欲壽中朝脉筭人間豈有病  
無醫須鍼石 年冉冉袍猶碧心耿耿頭先白笑臣舒  
迂緩臣山愚直拂袖歸來羞炙手望塵拜了難伸膝把  
富春瀨與首陽山圖齋壁

滿江紅

三黜歸來飯蔬食渾無愠色中年後家如旅舍身如行  
客軒冕豈非疣贅具烟霞已是膏肓脉有些兒隙地更  
疏泉堆卷石 鄰媪餉新筍碧溪友賣鮮鱗白向陳編



冷笑孔明元直俗事不教污兩耳燕居聊可盤雙膝取  
當年行脚一枝筇懸高壁

蒲江紅

疇昔臚傳仗下奏祥雲五色何況是西山弟子鶴山賓  
客上帝照臨忠義膽老師付受文章脉問此君髣髴似  
何人徂徠石 園官菜登盤碧田舍米翻匙白懶投詩  
鬼素寄書杓直德耀不嫌爲隱髻龜兒已解搖吟膝有  
誰憐給札老相如家徒壁

蒲江紅

下見西山料它目面無懸色君記取不爲呂黨亦非秦

客十客有有意挽回當世事無方延得諸賢脉笑海波渺  
渺幾時平空啣石 園五畝紛紅碧家四世傳清白任  
天孫笑拙女嬃嫌直老去何煩援以手向來不要加諸  
膝待傑山深處着茅齋看青壁

滿江紅壽唐夫人

八十加三人盡訝還童返少爭信道夜春曉織總曾經  
了凜凜共姜當日誓諄諄孟母平生教到如今象服擁  
魚軒天之報 如船藕如瓜棗斑衣舞金鐘醕望秋宵  
一點老人星照塵世少如孃福壽上蒼知得兒忠孝待  
看它孫子又生孫添懷抱

滿江紅

和吳叔永尚書  
時吳喪少子

着破青鞵渾不憶  
蹋它龍尾更冷笑  
癡人擘劃二三百  
歲殤子彭籤誰壽  
天靈均漁父爭醒  
醉向江天極目羨  
禽魚悠然矣  
杯中物姑停止  
床頭易都拋廢  
慨事常八九  
不如人意白雪調  
高尤協律落霞語  
好終傷綺待  
煩公老手一摩挲  
文公記

風入松

福清道  
中作

橐泉夢斷夜初長  
別館淒涼細思二十年中事  
歎人琴已矣俱亡  
改盡潘郎鬢髮銷殘  
荀令衣香  
多年布被冷如霜  
到處同床簫聲一去無消息  
但回首天海茫茫

舊日風煙草樹而今總斷人腸

風入松同前

歸鞍尚欲小徘徊  
逆境難排人言酒是銷憂物  
奈病餘孤負金罍  
蕭瑟搗衣時候  
淒涼鼓缶情懷  
遠林搖落晚風哀  
野店猶開多情惟是燈前影伴  
此翁同去同來  
逆旅主人相問  
今迴老似前迴

風入松

癸卯至石塘追和十五年韻

殘更難睡抵年長  
曉月淒涼芙蓉院落深深閉  
歎芳卿今在今亡  
絕筆無求  
皇曲癡心有返魂香  
起來休鑷鬢邊霜  
半被堆床定歸兜率  
蓬萊去奈人間無路茫茫

緣斷謾三彈指憂來欲九迴腸

風入松 同前

攀翻宰樹暫徘徊草草安排昔人徒步陳雞絮愧公家  
僕馬觥壘華表舊愁滿目黃梁殘夢傷懷 欲將莊列  
等歡哀對卷慵開憑高指點虛無路問何年遠鶴歸來  
宿酒得風漸解小輿待月同迴

水龍吟二首

己亥  
自壽

年年歲歲今朝左弧懸罷渾無事吾衰久矣我辰安在  
老之將至懶寫京書怕看除日敗人佳思把東籬掩定  
北牕開了悠然酌頽然睡 客有過門投贄道先生訪

華胥氏誰能辛苦陪它綺語記它奇字屈指先賢戴花  
老監豈其苗裔待異時約取寬夫彥國入耆英會

先生放逐方歸不如前輩抽身早臺郎舊秩看來俗似  
散人新號起舞非狂行吟非怨高眠非傲嘆終南捷徑  
太行盤谷用卿法從吾好 閉了草廬長嘯後將軍來  
時休報床頭書在古人出處今人非笑製箇淡詞呷些  
薄酒野花簪帽願雲臺任滿又還因任賽汾陽考

水龍吟二首

自和前韻

病翁一榻蕭然

劉屏山號病翁

不知世有歡娛事雀羅庭院載

醪客去催租人至報荅秋光要些酒量要些詩思奈長

鯨罷吸寒蛩息響茶甌外惟貪睡 窮巷幸無干贄或  
相過莫知誰氏柴門草戶闕人守舍任伊題字自和山  
歌國風之變離騷之裔待從今向去年年強健插花高  
會

平生酷愛淵明偶然一出歸來早題詩信意也書甲子  
也書年號陶侃孫兒孟嘉甥子疑狂疑傲與柴桑樵牧  
斜川魚鳥同盟後歸于好 除了登臨吟嘯事如天莫  
相諮報田園閑靜市朝翻覆回頭堪笑節物催人東籬  
把菊西風吹帽做先生處士一生一世不論資考

浪淘沙

紙帳素屏遮全似僧家無端霜月闌窗紗喚起玉關征  
戍夢幾疊寒笳 歲晚客天涯短髮蒼華今年衰似去  
年些詩酒新來俱倚闌孤負梅花

浪淘沙

疊嶂碧周遮游子思家掩藏白髮顰烏紗落日倚樓千  
萬恨社鼓城笳 老去淡生涯虛擲年華臘茶盃子太  
清些待得癡兒公事畢謝了梅花

浪淘沙二首

丁未  
生日

去歲詣公車天語勤渠絳紗玉斧照寒儒恰似昔人曾  
夢到帝所清都 骨相太清臞謫墮須臾今年黃勅換



稱呼只爲此翁霜鬢禿老不中書

早歲類寒蛩晚節遭逢曾開黃卷侍重瞳歸去青藜光

照牖堦藥翻紅

出畫頗忽忽主眷猶濃除官全似紫

陽翁

寶文

漳州換箇新街頭面改又似包公

小龍

念奴嬌

木犀

遶籬尋菊菊猶遲  
舍北芙蓉渾未却是小山叢桂裏  
一夜天香飄墜  
約束奴兵丁寧稚子莫掃青苔砌  
風高露冷倚欄疑匪人世  
客有載酒過予  
朗吟招隱洗盡悲  
秋意白髮長官窮似虱剛被天公調戲  
遍地堆金滿空  
雨粟不濟淵明事  
殘英賸馥明朝猶可同醉

念奴嬌菊

老夫白首尚兒嬉廢圃一番料平理餐飲落英并墜露  
重把離騷拈起野艷幽香深黃淺白占斷西風裏飛來  
雙蝶繞叢欲去還止 嘗試詮次羣芳梅花差可伯仲  
之間耳佛說諸天金色界未必莊嚴如此尚友靈均定  
交元亮結好天隨子籬邊坡下一杯聊泛霜蘂

念奴嬌

壬寅生日

比如去歲前年今朝差覺阿庭靜玉軸錦標無一首知  
道先生遠佞假使文殊携諸菩薩來問維摩病無花堪  
散亦無香積齋觀 回首雪浪驚心黃茅過頂瘴毒如

炊甑山鬼海神俱長者饒得書生窮命不慕飛仙不貪  
成佛不要鑽天今年年今日白頭母子家慶

念奴嬌

壽方  
德潤

卯君來處與眉州僊子依稀同日一自前朝龔蔡後頗  
覺壺山岑寂誰料端平繼居遺補復有斯人出幅巾林  
下姓名玉座長憶 須信諂語尤甘忠言最苦橄欖何  
如蜜諸老蕭疎星欲曉留取南都鐵壁洛社自佳鏡湖  
雖好莫問君王乞年年歲歲大家同做真率

念奴嬌

丙午鄭少  
師生日

禁中張讌苦留公未許歸尋初服千載君臣魚有水不

比嚴光文叔火德中天客星一夕草草聊同宿重來凝  
碧依然賡載相屬 過眼夸奪紛紛浮雲野馬幾度棋  
翻局客話鳳池三入事洗耳湖光一曲伯始泉荒穉珪  
圃冷占斷西風菊年年歲歲金英常泛芳醪

木蘭花慢

壽王  
實之

瀛洲真學士爲底事在紅塵爲語觸宮闈沉香亭裏嗔  
謫僊人爲親近君側者見萬言策了甚劉蕡爲是尚方  
請劔漢廷多憚朱雲 君言往事勿重陳且鬪酒邊身  
也不會區區算它甲子記甚庚寅爾曹譬如朝菌又安  
知老柏與靈椿世上榮華難保古來名節如新

木蘭花慢

癸卯生日

病翁將耳順牙齒落鬢毛疎也慙愧君恩放還田舍免  
詣公車兒時某丘某水到而今老矣可樵漁寶馬華軒  
無分蹇驢破帽如初 浮名箕斗竟成虛磨折總因渠  
帝錫余別號江湖聲叟山澤仙臞尊前未宜感慨事猶  
須看歲晏何如衛武老年作戒伏生九十傳書

木蘭花慢

送鄭伯昌

古人吾不見君莫是鄭當時更築就山房躬耕谷口名  
動京師諸公任他衮衮與杜陵野老共襟期有客至門  
先喜得錢沽酒何疑 昔年聯轡柳邊歸陳迹恍難追

况種桃道士看花君子回首皆非相逢故人問訊道劉  
郎老去久無詩把做一場春夢覺來莫要尋思

木蘭花慢

丁未  
中秋

水亭凝望久期不至擬還差隔翠幌銀屏新眉初畫半  
面猶遮須臾淡烟薄靄被西風掃盡不留些失了白衣  
蒼狗奪回雪兔金蟾 乘雲徑到玉皇家人世鼓三槌  
試自判此生更看幾度小住爲佳何須如鉤似玦便相  
將只有半菱花莫遣素娥知道和它髮也蒼華

最高樓

戊戌  
自壽

南嶽後累任作祠官試說與君看仙都玉局纔交卸新

銜又管華州山恠先生吟膽壯飲腸寬  
去歲擁旌旗稱太守今歲帶笈簪稱漫叟  
慵入鬧慣投閑有時拂袖尋種放有時  
携枕就陳搏任傍人嘲潦倒笑癡頑

最高樓

再題周登樂府

周郎後直數到清真君莫是前身八音相應諧韶樂一  
聲未了落梁塵笑而今輕郢客重巴人只少箇綠珠  
橫玉笛更少箇雪兒彈錦瑟欺賀晏壓黃秦可憐樵唱  
并菱曲不逢御手與龍巾且醉眠篷底月甕間春

臨江仙

縣圃種花

落魄長官江海客少豪萬里尋春而今憔悴向溪濱斷

無觴詠興惟有簿書塵 手插海棠三百本等閑粧點  
芳辰他年絳雪映紅雲丁寧風與月記取種花人

臨江仙 庚子重陽余以漕攝帥會前帥唐伯玉  
前漕黃成父于越王臺明年是日寓海

豐縣  
驛作

去歲越王臺上飲席間二客如龍憑高吊古壯懷同馬  
嘶千嶂暮樂奏半天中 今歲三家村市裏故人各自  
西東菊花時節酒樽空可憐雙雪鬢禁得幾秋風

臨江仙 湖惠  
道中

不見仙湖能幾日塵沙變盡形容夜來月冷露華濃都  
忘茅屋下但記畫船中 兩岸綠陰猶未合更須補竹



添松最憐幾樹木芙蓉手栽纔數尺別後爲誰紅

臨江仙已酉和實之燈夕

玉遂鈿車當日事東塗西抹都曾等閑曲子壓和凝曲相縱遊非草草已醉強惺惺今向三家村送老身如罷講吳僧高樓百尺不須登半爐燒葉火一瓊勘書燈

昭君怨牡丹

曾看洛陽舊譜只許姚黃獨步若比廣陵花太虧他舊日王侯園圃今日荆榛狐兔君莫說中州怕花愁

昭君怨瓊華

后土宮中標韻天上人間一本道號玉真妃字瓊姬

我與花曾半面流落天涯重見莫把玉簫吹怕驚飛

清平樂

五月十五  
夜翫月

纖雲掃迹萬頃玻璃色醉跨玉龍游八極歷歷天青海  
碧 水晶宮殿飄香羣仙方按霓裳消得幾多風露變  
教人世清涼

清平樂

同前

風高浪快萬里騎蟾背曾識姮娥真體態素面元無粉  
黛 身游銀闕珠宮俯看積氣濛濛醉裏偶搖桂樹人  
間喚作涼風

清平樂

贈陳參議  
師文侍兒

宮腰束素只怕能輕舉好築避風臺護取莫遣驚鴻飛  
去一團香玉溫柔笑顰俱有風流貪與蕭郎眉語不  
知舞錯伊州

清平樂

丹陽舟中作

休彈別鶴淚與絃俱落歡事中年如水薄懷抱那堪作  
惡昨宵月露高樓今朝煙雨孤舟除是無身方了有  
身長有閑愁

長相思

惜梅

寒相催暖相催催了開時催謝時丁寧花放遲  
角聲吹笛聲吹吹了南枝吹北枝明朝成雪飛

長相思 寄遠

朝有時暮有時潮水猶知日兩迴人生長別離  
來有時去有時燕子猶知社後歸君行無定期

長相思 餞別

風瀟瀟雨瀟瀟相送津亭折柳條春秋不自聊  
煙迢迢水迢迢淮擬江邊駐畫橈舟人頻報潮

長相思

煙淒淒草淒淒野火原頭燒斷碑不知名姓誰  
印累累冢累累千萬人中幾箇歸榮華朝露晞

長相思

勸一杯復一杯短鍾相隨死便埋英雄安在哉 眉不  
開懷不開幸有江邊舊釣臺拂衣歸去來

菩薩蠻

戲林推

小鬟解事高燒燭羣花圍繞樗蒲局道是五陵兒風騷  
滿肚皮 玉鞭鞭玉馬戲走章臺下笑殺灞橋翁騎驢  
風雪中

玉樓春

戲林推

年年躍馬長安市客舍似家家似寄青錢換酒日無何  
紅燭呼盧宵不寐 易挑錦婦機中字難得玉人心下  
事男兒西北有神州莫滴水西橋畔淚

生查子

元夕戲  
陳敬叟

繁燈奪零華戲鼓侵明發物色舊時同情味中年別  
淺畫鏡中眉深拜樓西月人散市聲收漸入愁時節

憶秦娥

暮春

遊人絕綠陰滿野芳菲歇芳菲歇養蠶天氣采茶時節  
枝頭杜宇啼成血陌頭楊柳吹成雪吹成雪淡煙微  
雨江南三月

憶秦娥

上巳

脩禊節晉人風味終然別終然別當時賓主至今清絕  
等閑寫就蘭亭帖豈知留與人間說人間說永和之

歲暮春之月

憶秦娥

泥滑滑一聲聲喚征鞍發征鞍發客亭楊柳不禁攀折  
荀郎衣上香初歇蕭娘心下書難說書難說霎時吹  
散一生愁絕

憶秦娥

春醒薄夢中毬馬豪如昨豪如昨日月明橫笛曉寒吹角  
古來成敗難描摸而今却悔當時錯當時錯鐵衣猶  
在不堪重著

憶秦娥

梅謝了塞垣凍解鴻歸早鴻歸早憑伊問訊大梁遺老  
浙河西面邊聲悄淮河北去炊煙少炊煙少宣和宮  
殿冷煙衰草

鵲橋仙

戊戌生朝

金風浙浙銀河淡淡長少群賢畢會平生心事翹生知  
恠此夕惺惺相對 玄花生眼新霜點鬢不肯遮藏老  
態人問何處有仙方擘劃得二三百歲

踏莎行

甲午重九  
牛山作

日月跳九光陰脫兔登臨不用深懷古向來吹帽插花  
人盡隨殘照西風去 老矣征衫飄然客路炊煙三兩



人家住欲携斗酒  
蒼秋光山深無覓黃花處

水調歌頭

游蒲澗追和  
崔菊坡韻

余頃為儀真郡督郵白事惟揚崔公銳欲羅致屬先受制置使李公之辟崔公始聘洪公舜俞入幕後二十五年奉使嶺外拜公祠像俯仰今昔輒和公所作水調以寓悲慨

敕使竟空返公不出梅關當年玉座記憶及席問平安  
羽扇尉佗城上野服仙游閣下遼鶴幾時還賴有蜀耆  
舊健筆與書丹青油士珠履客各凋殘四方蹙蹙靡  
騁獨此尚寬閑丞相祠堂何處太傅石碑墮淚木老瀑  
泉寒往者不可作置酒且登山

再和喜歸

遣作嶺頭使似戍玉門關來時送者舉酒珍重視身安  
街畔小兒拍笑馬上是翁鬢鑠頭與壁俱還何處得仙  
訣髮白頰猶丹 屋茅破籬菊瘦架籤殘老夫自計甚  
審忙定不如閑客難揚雄拓落友笑王良來往面汗背  
芒寒再拜謝不敏早晚乞還山

三和解印有  
期戲作

老子頗更事打透利名關百年擾擾于役何異入槐安  
夢裏偶然得意醒後纔堪發笑蟻穴駕車還恰佩南柯  
印髻髯較曾丹 客未散日初昡酒猶殘向來幻境安  
在回首揔成閑莫問浮雲起滅且跨剛風遊戲露冷玉

簫寒寄語抱朴子候我石樓山

四和

八月上解解印  
別同官席上賦

半世慣岐路不怕唱陽關朝來印綬解去今夕枕初安  
莫是散場優孟又似下棚傀儡脫了戲衫還老去事多  
忘公莫笑師丹 筆端花冑中錦兩消殘江湖水草空  
曠何必養天閑久苦諸君共事更盡一杯別酒風露夜  
深寒回首行樂地明日隔雲山

五和

客散循堤  
步月而作

落日幾呼渡佳夕每留關有時來照清淺鬢雪似潘安  
一曲親蒙君賜兩岸更無人迹惟見鷺飛還隙地欠栽

接蕉荔雜黃丹 柳全疎松尚幼怕摧殘傍人笑我癡  
計管鑰費防閑翁意在平林壑客亦知夫水月滿腹貯  
清寒賦詠差有愧赤壁與滁山

六和次夕觴客湖  
上賦葛仙事

羯虜問周鼎柱史出秦關苦求勾漏何意身世遠差安  
不見跼鴛墮永時有飛鴻遵渚樂此久忘還采藥寓言  
耳曾次有靈丹 釣游處榕葉暗荻花殘自翁仙後千  
載輸與水鷗閑我讀內篇未竟忽被急符驅去洞閉白  
雲寒回首愧幽子隱約海中山

七和十三夜同官載酒  
相別不見月作

恠事廣寒殿此夕不開關林間烏鵲相賀暫得一枝安  
只在浮雲深處誰駕長風挾取明鏡忽飛還玉兔呼不  
應難覓白中丹 酒行深歌聽徹笛吹殘嫦娥老去孤  
令離別匹如閑待得銀盤擎出只怕玉峯醉倒衰病不  
禁寒卿去我欲睡辜負此湖山

水調歌頭

癸卯中秋作

老去有竒事天放兩中秋使君飛榭千尺縹緲見麟洲  
景物東徐城上歲月北征詩裏圓缺幾時休俯仰慨今  
昔惟酒可澆愁 風露高河漢澹素光流賈胡野老相  
慶田海十分收競看姮娥金鏡爭信僊人玉斧費了一

番修衰晚筆無力誰伴賦黃樓

門人迪功郎新差昭州司法參軍林

秀發

編次

後村集卷第二十

丙辰三月庾樓景寫